

# АКАФИСТ ПРЕПОДОБНЫМ И БОГОНОСНЫМ ОТЦАМ НАШИМ АНТОНИЮ И ФЕОДОСИЮ ПЕЧЕРСКИМ

## Кондак 1

Избранныи и Духа Святаго исполнении, преподобнии и богоноснии отцы наши, Антоние и Феодосие Печерстии, преизящная Русския земли прозябения, пречудная русскаго народа украшения, хотящу мне, недостойному, похвальное вам совершити пение, смиренно вас молю, потемненный мой разум светом данья вам от Бога благодати озарите, мрак неведения просветите, неудобства и препоны разрушите, мою немощь укрепите, нас же всех, сынов русских от всех бед и напастей, скорбей и болезней отечески свободите, да в теплоте сердца из глубины души вси купно вопием вам: Радуйтесь, Антоние и Феодосие, монашескаго в Руси жития первоначальницы.

## Икос 1

Ангелом подобнаго желающе жития, абие в юности своей вся красная мира разсудне пренебрегосте; и аки сметие от себе отвергше, детскими попрасте ногами, вас же всецелых, в дар Христу Богу и приношение освятите, тем таковое ваше святое и богоприятное разсуждающе произволение, сицевое вам приносим пение: Радуйтесь, отцы богоноснии, вся земная, благая и красная мира презревшии; радуйтесь, Христа от юности всем сердцем и всею душою возлюбившии. Радуйтесь, дом, имения и вся родителей стяжания ни во что вменившии; радуйтесь, благое и сладкое иго Христово на рамена, в детстве еще суще, взявшии. Радуйтесь яко уподобистеся преподобнаго Авеля богоприятному приношению; радуйтесь, яко подражателие бысте боголюбиваго Ноя в благодарном его по изшествии из ковчега жертвоприношении. Радуйтесь, ваша телеса вместо тучных агнцов и тельцов, Создателю своему принесшии; радуйтесь, души ваша, вместо благовоннаго фимиама, Христу Спасителю вознесшии. Радуйтесь, сердца ваша во всегдашнее Богу и Божией Матери служение добре уготовавшии и всецело предавшии; радуйтесь, все ваше житие, подобне Самуилу, на служении Божии даже до последнего издыхания красно и богоугодно препроведшии. Радуйтесь, многое множество мужей и жен, юношей и дев вашему подражати житию научившии; радуйтесь, благий и легкий ярем Христов многим усладившии. Радуйтесь, Антоние и Феодосие, монашескаго в Руси жития первоначальницы.

## Кондак 2

Видя всевидящее око Отца Светов таковое ваше Богу вельми благоугодное начинание и душеспасительное намерение, аще и не абие вас купно жителствовати устрои, обаче не в долгом времени сие вас соедини и совокупи, якоже соедини и совокупи Павла Петру, да един ярем понесше, многих в небесная введете обители; чесому мы удивляющеся, благодарственно Богу, тако устроившему, поем: Аллилуиа.

## Икос 2

Разум богоприятен, Антоние, всехвальне, тебе же самому и прочим душеполезен стяжати усердствуя, сего днем и нощию от Всемиловитоваго Бога с теплыми слезами прилежно просил еси, пророчески вещая: “Скажи ми, Господи, путь, воньже пойду”. Темже человеколюбивый Бог, вняв твоему слезному молению, вложи в твое сердце, да не медля в Афонскую Гору идеши, ты же, аки второй Авраам, ялся еси пути с велиим тщанием, Божие исполняя веление, чесо ради вопиеш тебе таковая: Радуйся, отче Антоние, древнему уподобивыйся Аврааму, по слову Божию, доброхотно и послушно, без скорби и сетования от сродник и южик своих удаляющемся; радуйся, в далечайшую неведомую страну, обретения ради монашескаго жития, от своих сил нескорбно удаливыйся. Радуйся, долгий, трудный и прескорбный путь скоротечно без смущения прешедый; радуйся, Ангела Божия в том пути спутника, якоже иногда Товия, имевый. Радуйся, Афонския Горы, по твоему желанию, Божию же изволению, благополучно достигнувый; радуйся, многая тамо духовная благая и душеполезная сокровища стяжавый. Радуйся, многих тамо своим любомудрым житием в посте и молитве, неустанном труде и бдении, и безответнем, Господа ради, послушании удививый; радуйся, в иноческих трудах и подвизех великим старцем Святыя Горы тебе сравнивый. Радуйся, Антоние, аки богомудрая пчела, от труждающихся тамо отец, аки от различных цветов, сладость иноческую собравый; радуйся, туюжде сладость во Отечество сохранный принесый, и zde благоуспешно насадивый и возрадивый сторицею. Радуйся, яко в монашество тоюжде сладостию многих, с нимиже и Феодосия Великаго в слове и деле привлекл еси; радуйся, яко собранную братию твою духовною сладостию изобильно насытил и в добродетелех укрепил еси. Радуйтеся, Антоние и Феодосие, монашескаго в Руси жития первоначальницы.

## Кондак 3

Сила Вышняго в чистое твое и непорочное всельшиися сердце, преблаженне Феодосие, тако всего тебе Божию любовью разжже, яко всех земных и временных удалятися, вечных же и нескончаемых выну искати тебе научи и вразуми. Тем таковое твое о спасении души зряще тщание и усердие, умильно Всесильному Богу поем: Аллилуиа.

## Икос 3

Имел еси, отче преблаженне Феодосие, превеликое желание, еже Святая в Иерусалиме посетити места, и к сему делу желаемую обрел еси удобность, ко грядущим в Иерусалим приобщився, но злобный враг спону тебе и препятие содела, наusti бо мать твою, яже вслед тебе гнавши, и достигши, аки злодея связана, в дом привлекши, по многом биении, твердо в храме заключи, ты же, аки адамант, сия злострадания терпеливо понесл еси, посем от заключения испущен, паки на хлебопечение церковному литургисанию приличное вдался еси, чесому удивляющесе, сиче тебе вопиеш: Радуйся, отче Феодосие, непоколебимый и нерушимый терпения столпе; радуйся, пречудный и прекрасный смире-

ния и кротости образе. Радуйся, тяжкая матерняя биения и ногами попираня благодушно и мужественно терпевый; радуйся, тояжде ласкания и лобзания аки смертоносный вред себе вменивый. Радуйся, служение Богу и Божией Матери паче всего вседушно возлюбивый; радуйся, церковному служению со всяким усердием от детства прилежавый. Радуйся, сверстников поругания и посмеяния в честь себе вменивый; радуйся, всем старым и юным образ смирения и кротости тебе представивый. Радуйся, всем обидящим тебе вседушно прегрешения простивый; радуйся, всеми добродетельными человеки паче сверстник твоих хвалимый, любимый и почитаемый. Радуйся, добронравием и благочестием краснее, неже светлыми ризами, тебе украсивый; радуйся, матерняя и властительская одеяния, яко скверное благо, вменивый. Радуйтесь, Антоние и Феодосие, монашескаго в Руси жития первоначальницы.

#### **Кондак 4**

От богомерзких сластей и волнений непреодоленен явился еси, преподобне отче наш Феодосие, ибо твое, еже непрестанно работати Господеви всегда имущи в уме и в сердце произволение, на кийждо день на большия простирался еси труды, и на кийждо день приятнейшим и любезнейшим Богу быти усердствовал еси, всякое же мира сладострастие и любочестие побеждая, Единому Богу выну воспевал еси: Аллилуиа.

#### **Икос 4**

Слышав преблаженне отче Феодосие, жестокое святаго Антония и острое в пещернем затворе житие, скоротечно, аки елень на источники водныя, к нему отай матере твоя текл еси, идеже доспевши прилежно его молил еси, да ты в свое сожительство приимет и в число иночествующих впишет, он же, провидев в тебе живущую благодать Божию, неотлагательно повеле на ты иноческий возложить образ, ты же за то благодаривши Бога Благодетеля, обоеручно иноческаго явился еси жития, и со Антонием купно непрестанно труждался еси, о чесом мы помышляюще, тако взываем к вам: Радуйтесь, Антоние и Феодосие, иноческаго жития основатели; радуйтесь, первейшии новоначальных иноков в Руси наставницы. Радуйтесь, в монашеское отишие, аки в некий корабль безопасный, к вам приходящих вводители; радуйтесь, предобрии в пучине мира сего влающих управители. Радуйтесь, мирския бури, волнения и мятежи в тишине мудре прелагающи; радуйтесь, всех любезно в доброе и спасительное пристанище наставляющи. Радуйтесь, свирепеющия врагов шатания мудре усмиряющи; радуйтесь, от всех неприязненных обуреваний к вам притекающих удобно спасающи. Радуйтесь всех под ваш покров и защищение отечески приемлющи; радуйтесь, всех без лицепрятия от всех напастей и бед защищающи. Радуйтесь, бедствующим всегда и во всем, и на коемждо месте добре предстательствующи; радуйтесь, обидимых, озлобляемых и уничижаемых присноходатайствующи. Радуйтесь, Антоние и Феодосие, монашескаго в Руси жития первоначальницы.

### Кондак 5

Богоявленные звезды, ихже на тверди Русской яви солнце премирное, лучами высокая ваша святыни многих просвещающия, многих на путь боговедения наставляющия, многих к иночеству приводящия, многих же в добродетелех, остром же и прискорбном житии утверждающия и укрепляющия, сие Божие изволение в вас добре исполнившееся зряще, поем благодарно Всемиловитому Богу: Аллилуиа.

### Икос 5

Видевше мнози богоугодное ваше в пещерах, аки во гробех, заключенное житие, умиляхуся душами, сердца же сокрушающесе, спешно к вам, спасения ищуще, притекаху смиренно просяще, да и их такового жития общниками соделавше, во всегдашнее Богу служение освятите, вы же помняще Рекшаго: “Грядущаго ко Мне не иждену вон”, всех приходящих любезно примаме, и отечески поучасте. Темже сицевым вас венчаем песнопением: Радуйтесь, преблаженнии отцы многих от работнаго ига мирскаго в сладкую духа свободу изведшии; радуйтесь, многих истинно Христу работати, и искренно Ему служити научившии. Радуйтесь, вашими добродетельми многим ко спасению, якоже иногда Моисей в землю обетованную, путь открывшии; радуйтесь, многих не уже в землю обетованную, но в самую Небесную жилища введшии. Радуйтесь, не словом точию, но множае паче делом и усердною к Богу молитвою своих учеников и последователей поучающии; радуйтесь, ваших купножителей монашескими правилами красно и боголепно управляющии. Радуйтесь, различными искушениями и напастьми отягченным скоро пособствующии; радуйтесь, от супостат боримым и тяжко насильствуемым всегда помоществующии. Радуйтесь, одолеваемых от сопротивных, но не отчаивающихся и богонадежно в молитве вас призывающих, внезапным вашим пособием подкрепляющии; радуйтесь, всякое враждебное устремление сильно воспящающии. Радуйтесь, собранное вами духовное стадо бодренным оком выну назирающии; радуйтесь, ваших учеников и наследников непрестанно на путь Божиих заповедей наставляющии. Радуйтесь, Антоние и Феодосие, монашескаго в Руси жития первоначальницы.

### Кондак 6

Проповедуемо и везде попремногу похваляемо бе ваше, преподобнии отцы, богоугодное и безмолвное житие, кто бо точию нестяжательное и в пещерных затворех продолжаемое сие видеви или слышав, ангелов вас паче, нежели челоуков быти не мняще; терпению же вашему и различному тела умерщвлению кийждо удивляяся, Богу приличное воздая благодарение, купно с вами пояше песнь: Аллилуиа.

### Икос 6

Возсияете на круге Русския церковныя области, преблаженнии, аще бо и самих себе в темных пещерах, аки под спудом, заключисте, обаче лучами ваших

подвигов и добродетелей, такожде вся окрестныя страны озаристе и просветите, якоже чувственное солнце мир озаряет и просвещает и тако много сердца к богоугодному житию возбудисте и согретье, и удобна к добродееанию сотвористе, яко и солнце, согревая землю, удобну творит ю к прозябению различных дров и плодов и былий сельных и всякаго злака на службу человеком и скотом. О сем благодаряще Бога, сицевое вам приносим пение: Радуйтесь, просветители в омрачении страстей пребывающих; радуйтесь, вразумители в суете и самозабвении жительствующих. Радуйтесь, руководители в недоумении и заблуждении сущих; радуйтесь, управители добре жити начинающих. Радуйтесь, укрепители в благом изнемогающих, и малодушием и унынием колеблемых; радуйтесь, возбудите в небрежении спящих. Радуйтесь, бодрости и трезвения предобрии учителя; радуйтесь, нерадения и праздности известнии прогонители. Радуйтесь, трудолюбия, еже всякому благу начало и утверждение, теплейшии рачители; радуйтесь, чистаго и непорочнаго жития неусыпающии хранители. Радуйтесь, всех ко спасению изящнии и вернии путеводители; радуйтесь, всех благочестно и богоугодно жити хотящих мудрии наставницы. Радуйтесь, Антоние и Феодосие, монашескаго в Руси жития первоначальницы.

### **Кондак 7**

Хотя всезлбный враг доброму вашему начинанию спону и препятие сотворити, тако князя противу вас гневом разжже и яростию распали за пострижение в иночество слуг его, паче прочих любимых, некоего евнуха и сына боярска, яко нужда вам в своя пещерная оставити жилища и инуде преселитися; обаче не долго сим своим ухищрением враждебник веселяшеся, ибо благодушный князь, вразумлен сый своею богобоящею супружницею, вскоре познав ваше незлобие, и вражию разсмотрев хитрость и коварство, с молением посла к вам, да на свое паки возвратитесь прежнее местопребывание, о чесом возрадовавшеся, благодарно воспесте Богу: Аллилуиа.

### **Икос 7**

Новый труд, и новый подвиг по возвращении в пещерная ваша жилища восприяли есте, отцы преподобнии: на расширение бо монашеских келлий и на устроение молитвеннаго храма неленостно устремистесь, да злокозненнаго врага гордыню поперете и его безстудное безумие посрамите, собранную же братию к богоугодному и добродетельному житию вящше возбудите, и на усерднейшее Христу Богу служение подвигнете, на то мы умныма взирающе очима, сице взываем к вам: Радуйтесь, пещернаго иноческаго пребывания трудолюбнии обретатели и ревнители; радуйтесь, теплии монашескаго жития и преславнии защитницы. Радуйтесь, обителей ваших бодрости и неусыпающии хранители; радуйтесь, княжняго гнева и ярости смиреннейшии укротители. Радуйтесь, врагов и неприятелей ваших истиннии и нелицемернии любители; радуйтесь, обиды вам творящих и напасти деющих праведнии рачители. Радуйтесь, заповедей и советов Божиих усерднейшии исполнители; радуйтесь, к чистому и непорочному житию предводители благоспешнии. Радуйтесь, добронравия и благоговения учителя преизящнии; радуйтесь, подвизающихся в благочестии и

труждающихся в благотворении всеильнии силою Христовою помощницы. Радуйтесь, в иноческих трудах неутружденнии подвижницы; радуйтесь, собранному вами стаду необоримии во всем поборницы. Радуйтесь, Антоние и Феодосие, монашескаго в Руси жития первоначальницы.

### **Кондак 8**

Странное ваше и вельми скорбное житие не токмо человеков на земли, но и Ангелов на небеси удиви: вы бо, заключившеся в пещерах, аки в темных гробех, всеусердно в теплоте сердца и души Единому Богу работасте, да та, яже во дни и в нощи Создателю вашему приносимая служения, неведома и незнаема будут миру, ведома же и знаема Самому Творцу явятся. Сею ради мы Богу, тако вас научившему и вразумившему, присно поем: Аллилуиа.

### **Икос 8**

Все ваше, преблаженнии и богоноснии отцы, тщание и все о том бяше попечение, да выну всезлобному рода христианского врагу сопротивляетесь и гордую его главу попираете и стираете, общаго же всем Творца, купно со ученики своими в душах и телесех ваших прославите и в сем благом изволении вашем и богоугодном подвиге укрепляемии силою свыше, толико преуспесте, яко вся возможосте о укрепляющем вас Христе Иисусе. Темже и слава Божия возсия из пещер ваших и озари вся концы земли, чесо ради таковое вам похвальное воздаем пение: Радуйтесь неутомимии хвалы и чести Божия в мире ревнители и проповедницы; радуйтесь, высокоумные вражия гордыни крепцыи смирители. Радуйтесь, враждебных наветов и стужений достохвальнии упразднители; радуйтесь, неприязненных сетей и пагубных козней мужественнии воспятители. Радуйтесь, глубоким смирением и кротостию, аки драгоценными бисерами себе украсившии; радуйтесь, в тех же боголюбезных добродетелех многих утвердившии. Радуйтесь, в постничестве и воздержании древним пустынножителем поревновавшии; радуйтесь, в неустанней молитве, без всякаго стужения и уныния, дни и нощи проводившии. Радуйтесь, в тойже пребывати молитве ваших последователей добре научившии; радуйтесь, како бодрствовать противо вражиим наветом и оных одолевати, образ и путь нам показавшии. Радуйтесь, на мысленныя враги пост, молитвы и коленопреклонения, вместо оружия, употреблявшии; радуйтесь, сицевым вашим тесным и скорбным житием Божию в мире славу умножившии. Радуйтесь, Антоние и Феодосие, монашескаго в Руси жития первоначальницы.

### **Кондак 9**

Всякий человеческого естества чин, нищих и богатых, худородных и высокородных на убогое, смиренное и вельми острое житие ваше взирая, велие Богу воздаваше благодарение и попремногу прославляйте Его благостыню и неизреченное милосердие, яко сице тесное и прискорбное проходити житие вас устрои, да вы многих от душегубительныя изведше стези, пастырски на стезю спа-

сения наставите, поучающе их присно пети Создателю и Промыслителю: Аллилуиа.

### **Икос 9**

Витии избраннии явистеся, преславнии отцы наши, но не по образу мира сею витийствовавшии, ибо яже мир сей любит, вы всем усердием возненавидесте, и яже блажит и вельми почитает, вы презресте, и далече от себе отвергше, аки непотребное и неполезное сметие, ногама своима попрасте, темже от всех таковое похвальное приемлете почитание: Радуйтесь, мира и всех его сластей, красот и прелестей доблестнии презрители; радуйтесь, иноческаго нестяжания и нищеты теплейшии любители. Радуйтесь, тела вашего и всех телесных чувств суровии умертвители; радуйтесь, кротости, смирения и воздержания приснии рачители. Радуйтесь, все ваше утешение и блаженство в нищете и нестяжании положившии; радуйтесь, безмолвием и от мира устранением зело себе удобрившии. Радуйтесь, всецело самих себе на Божий Промысл попечение возложившии; радуйтесь, сладких брашен и гортанугодных питий никогдаже похотевшии. Радуйтесь, мягких и светлых одеяний на ся никакоже возложившии; радуйтесь, многоценныя украшения, во всецелом вашем житии всегда с любовью носившии. Радуйтесь, вместо избранныя пищи, постом многодневным и острым тела умерщвлением вас питавшии; радуйтесь, вместо сладкого пития, сердечными слезами себе самих напаявавшии. Радуйтесь, Антоние и Феодосие, монашескаго в Руси жития первоначальницы.

### **Кондак 10**

Спасти хотя многих, всех обращения и спасения милостивно ожидаяй Премилосердый Бог, других вас апостолов Руси яви, да вами многих вразумит и на правый спасения путь наставит, в чем вы апостольски потруждшесе, в неведении сущих евангельской истине неленостно поучая, к правоверию приведосте и к хранению Божиих заповедей и богоугодному и чистому житию словом и делом непрестанно возбуждасте, поя Богу Помощнику: Аллилуиа.

### **Икос 10**

Стена тверда и крепкое ограждение явистеся, всехвальнии отцы, к вам прибегающим, не точию бо иночествовати с вами хотящим руку помощи милостивно подавасте, но и различными мирскими делы, напастыи и скорбьми отягченных и утесненных тако утешасте, якоже родители чада своя во обстоянии скорбей и болезней сущия, утешают, отраду им своим попечением подающе и отеческою ласкою тяжесть скорбей облегчающе. За каковое ваше благодетельство сицевое вам благодарственное воздаем пение: Радуйтесь, бедствующим и различными напастыи боримым скории помощницы; радуйтесь, обидимых и озлобленных известнии защитницы. Радуйтесь, обуреваемых тяжкими мира сего прилоги предобрии кормчии; радуйтесь, убожествующих и в скорбней нищете сущих всещедрии обогатители. Радуйтесь, алчущих и гладствующих милостивии кормители; радуйтесь, нестерпимую палимых и утесняемых

жаждою предивнии прохладители. Радуйтесь, одежды и крова лишенным в недрах милосердия Божия покров и убежище открывающими; радуйтесь, слепотствующих, наипаче же в законе Господни заблуждающих, пречуднии руководители. Радуйтесь, болезнями и тяжкими недуги одержимых и томимых премудрии уврачеватели; радуйтесь, всех напастей, бед и скорбей сильнии и крепцыи прогонители. Радуйтесь, всякаго добра временнаго и вечнаго податели; радуйтесь, с верою к вам притекающих от всех скорбных обстояний теплии защитители. Радуйтесь, Антоние и Феодосие, монашескаго в Руси жития первоначальницы.

### **Кондак 11**

Пение еже приносим вам, богоноснии отцы, несть довольно к похвалению преславных ваших подвигов и труд вышечеловеческих, яко бо житие бе превосходящее житие человеческое, ангельскому же подобящееся, сице и похвалам от ангел паче, нежели от человек вам приносимым быти достоин: обаче усердное наше зряще произволение, любезно приносимое нами примите пение, нас же от грех и всяких скверен и нечистот вашими молитвами очистите, на всяк день и час чистым сердцем поем Богу: Аллилуиа.

### **Икос 11**

Светоподательная на земном крузе явистася светила, Божия благодати исполненная, отцы преблаженнии, всю вселенную, из подземнаго пещернаго спуда, пресветлыми вашими добродетельми ясно просвещающая, дела бо ваши из подземных воссиявше заключений, тако всему миру во уведение и познание приидоша, яко и Восток оная ублажает, и Запад величает, и Юг восхваляет, и Север попремногу прославляет. Темже и мы сице вам от любви припеваем: Радуйтесь, всех добродетелей неленостнии исполнители; радуйтесь, многих монашеских обителей предобрии соградители. Радуйтесь, всяких добродетелей пресветлая зеркала; радуйтесь, крепкая и непреодолимая ваших обителей забрала. Радуйтесь, прекрасная и пречудная Духа Святаго жилища; радуйтесь, всех богоугодных и благоприятных дел преудобренная вместилища. Радуйтесь, Творцу и Богу вашему во временнем житии добре угодившии; радуйтесь, к исходу от сея временныя и многотрудныя жизни прекрасно себе уготовившии. Радуйтесь, ваших учеников, аки истинных чад, не точию в животе сем, но и при исходе наипаче на богоугодное житие наставившии; радуйтесь, темже учеником, по отшествии отсюда, невидимое спребывание и всегдашнее содействие и помощь обещавшии. Радуйтесь, в небесная жилища богопоспешно без всякаго препятія вшедшии; радуйтесь, мзду велию за ваша иноческа я злострадания от Всещедраго Мздовоздаятеля восприемшии. Радуйтесь, Антоние и Феодосие, монашескаго в Руси жития первоначальницы.

### **Кондак 12**

Благодать, юже Всемиловитый и Всещедрый Бог, от Своих неистошмих подаваше сокровищ, никогдаже в вас тща и праздна бываше, но выну обилен плод творяше, аки зерно доброе в добрую вверженное землю, вы бо верным и



мудрым рабом, от своего господина таланты взявшим, уподобившеся, тако силами, свыше вам подаваемыми, трудолюбне деласте, яко да и Богу приятни и любезни явитесь, и себе в небесных селениях нескончаемое приобретете воздаяние, непрестанно поюще Богу: Аллилуиа.

### **Икос 12**

Поюще ваше безмолвное и весьма от житейских и мирских попечений удаленное, со Единым Богом житие, похваляем многоболезненныя труды и подвиги ваши, почитаем дневныя и всенощныя бдения и молитвы, славим частыя долугления и коленопреклонения, и вся та чтим плоти умерщвления и духа сокрушения, яже любви ради Христовы благодушно подъясте, воспоминаем купно и мздовоздаяния, яже от Праведнаго Судии и Мздовоздаятеля Бога обильно восприяли есте, сице воспевающе: Радуйтесь, в Небесней нескончаемей Славе Ангелом уподобившиися; радуйтесь, честь равную Патриархом приемшии. Радуйтесь, в чине пророков, яко дар пророчества имущии вписаннии; радуйтесь, к лику апостолов и евангелистов, яко словом и делом Христа благовестившии, сопричтеннии. Радуйтесь, в сонме мучеников, яко много Христа ради претерпевшии, благочестно восприятии; радуйтесь, в собрании исповедников саном исповедничества почтеннии. Радуйтесь, с девствующими, яко девственницы, возвеличеннии; радуйтесь, со всеми святыми добре Богу угодившими, участие и наследие обретшии. Радуйтесь, пресладким и блаженным Пресвятыя Троицы лицезрением выну насыщающимися; радуйтесь, по иноческих подвизех и постнических трудех нескончаемым упокоением наслаждающимися. Радуйтесь, неизреченных благ, преподобным от века уготованных, наследия праведно удостоившиися; радуйтесь, Царствия Небеснаго, вся в себе сладости и красоты, вся величия и блаженства, ум человеческий превосходящия, содержащаго, общницы и обладатели явившиися. Радуйтесь, Антоние и Феодосие, монашескаго в Руси жития первоначальницы.

### **Кондак 13**

О преблаженнии и всякия чести достойнии, отцы богоноснии, Антоние и Феодосие Печерстии, малое сие моление, нами, недостойными, вам от любви приносимое, любезно приемше, ваше купно же и наше Отечество, от всех неприязненных нападений и вражиих наветов непоколебимо и невредимо соблюдайте, нас же, сыновне с верою и любовью к вам притекающих, от всяких бед, скорбей и напастей отечески избавите, да выну благодарно поем о вас Богу Спасителю: Аллилуиа.

**(Этот кондак читается трижды, затем икос 1 и кондак 1)**